

Predsjedavajući arbitar Clint Williamson u posjeti BiH



Predsjedavajući arbitar Arbitražnog tribunala za Brčko, ambasador Clint Williamson, posjetio je ove sedmice Brčko i Sarajevo i sastao se sa domaćim zvaničnicima kako bi sa njima razgovarao o poštivanju Konačne arbitražne odluke za Brčko, reformskim inicijativama i prioritetima vlasti Brčkog, kao i o sveukupnom političkom okruženju u BiH.

Zajedno sa prvim zamjenikom visokog predstavnika i supervizorom za Brčko Jonathanom Mennutijem, ambasador Williamson sastao se u Brčkom sa rukovodstvom Vlade i Skupštine Distrikta i informirao se o aktuelnoj zakonodavnoj reformi koja će doprinijeti ciljanom izdvajanju budžetskih sredstava za razvoj infrastrukture, kao i o mjerama usmjerenim na jačanje kapaciteta Ureda za borbu protiv korupcije Brčko Distrikta.

Na sastanku sa predstavnicima Ureda za borbu protiv korupcije Brčko Distrikta, ambasador Williamson se interesirao za rad ovog ureda, saradnju s drugim organima za provođenje zakona i institucijama Distrikta, te za razvoj lokalnih kapaciteta za provođenje snažne antikorupcijske politike u Distriktu.

U petak su se ambasador Williamson i supervizor Mennuti sastali sa savjetnicima iz Predsjedništva BiH. Williamson je pozdravio opredijeljenost koju su organi vlasti pokazali u namjeri da promoviraju okruženje pogodno za provođenje reformi javne uprave, razvoj infrastrukture i borbu protiv korupcije u

Brčkom. Ponovio je da svi nivoi vlasti u BiH imaju obavezu da podrže ove napore u skladu sa Konačnom arbitražnom odlukom.

Tokom posjete, predsjedavajući arbitar se sastao sa visokim predstavnikom, kao i sa nekoliko ambasadora i diplomata, te je s njima razgovarao o sveukupnim političkim dešavanjima u BiH.